

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**ZAKON  
O IZMJENAMA I DOPUNAMA KRIVIČNOG ZAKONA  
FEDERACIJE BOSNE I HERCEGOVINE**

**Sarajevo, februar 2016. godine**

## **PRIJEDLOG ZA DONOŠENJE ZAKONA PO HITNOM POSTUPKU**

Predlažemo donošenje Zakona o izmjenama i dopunama Krivičnog zakona Federacije Bosne i Hercegovine po hitnom postupku.

Kao osnovni razlog za donošenje ovog zakona po hitnom postupku ističemo da bi se izbjeglo nastupanje štetnih posljedica po Federaciju Bosne i Hercegovine pa su u tom smislu ispunjeni uvjeti iz člana 191. stav (2) Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07 i 2/08) i člana 186. stav (2) Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03 i 21/09).

Naime, opredjeljenje ovog zakonskog prijedloga jeste suzbijanje društveno opasnih ponašanja kao što su krivična djela učinjena iz mržnje, krivična djela navođenja na prostituciju, krivična djela trgovine ljudima. U tom smislu, izvršene su odgovarajuće intervencije na općem i posebnom dijelu Krivičnog zakona Federacije Bosne i Hercegovine.

Kao argument u korist navedenih izmjena smatramo potrebnim istaći da je na snagu stupio Zakon o izmjenama i dopunama Krivičnog zakona Bosne i Hercegovine („Službeni glasnik BiH“, broj 40/15) čime je nastala pravna praznina u regulisanju krivičnog djela trgovine ljudima na nivou Federacije Bosne i Hercegovine, te je nužno što prije izvršiti potrebnu intervenciju kako bi se otklonile moguće negativne posljedice postojanja takvog pravnog vakuma.

**Z A K O N**  
**O IZMJENAMA I DOPUNAMA KRIVIČNOG ZAKONA FEDERACIJE BOSNE I**  
**HERCEGOVINE**

**Član 1.**

U Krivičnom zakonu Federacije Bosne i Hercegovine ("Službene novine Federacije BiH", br.36/03, 37/03, 21/04, 69/04, 18/05, 42/10, 42/11, 59/14 i 76/14) u članu 2. stav 8. riječi: „službujući u Federaciji koja radi za naknadu ili bez naknade“, brišu se.

Iza stava 8. dodaju se novi st. 9, 10. i 11. koji glase:

„(9) Sudija porotnik je osoba koja je član kolegijalnog tijela koje ima odgovornost odlučivanja o krivnji optužene osobe i izricanja krivično-pravne sankcije u postupku suđenja.

(10) Arbitar je osoba koja je, na osnovu sporazuma o arbitraži, pozvana da donese pravno obavezujuću odluku u sporu koji mu podnesu stranke sporazuma.

(11) Krivično djelo iz mržnje je svako krivično djelo, učinjeno zbog rasne pripadnosti, boje kože, vjerskog uvjerenja, nacionalnog ili etničkog porijekla, jezika, invaliditeta, spola, seksualne orijentacije ili rodnog identiteta druge osobe. Takvo postupanje uzet će se kao otežavajuća okolnost ako ovim zakonom nije izričito propisano teže kažnjavanje za kvalifikovani oblik krivičnog djela učinjenog iz mržnje.“

Dosadašnji st. 9. do 33. postaju st. 12. do 36.

**Član 2.**

U članu 16. stav (1) dodaje se nova rečenica koja glasi: „Zastarjevanje krivičnog gonjenja za krivična djela trajnog karaktera počinje teći u trenutku prestanka protivpravnog stanja.“

**Član 3.**

U članu 43a. stav (2) riječi: „s jednim dnevnim iznosom novčane kazne ili“ brišu se.

**Član 4.**

U članu 43b. stav (5) riječi: „amnestija i pomilovanje mogu se“, zamijenjuju se riječima: „pomilovanje se može“.

**Član 5.**

U članu 110. iza stava (2) dodaju se novi st. (3) i (4) koji glase:

„(3) Izuzetno od odredbe stava 2. ovog člana, kazna dugotrajnog zatvora može se izvršavati i u ustanovana poluotvorenog tipa pod uvjetom da je osuđena osoba izdržala dvije trećine kazne dugotrajnog zatvora i pod uvjetom da uredno koristi vanzavodske pogodnosti.

(4) Na postupak premještaja osuđene osobe iz stava 3. ovog člana shodno se primjenjuju odredbe o premještaju osuđenih osoba propisanih odredbama Zakona o izvršenju krivičnih sankcija u Federaciji Bosne i Hercegovine.“

Dosadašnji stav (3) postaje stav (5).

### **Član 6.**

U članu 166. stav 2. tačka c) riječi: „rasnih, narodnosnih ili vjerskih pobuda“ zamijenjuju se rječju „mržnje“.

Tačka e) mijenja se i glasi:

„ e) ko usmrti sudiju ili tužioca u vezi sa vršenjem njihove sudijske ili tužilačke dužnosti, službenu ili vojnu osobu pri obavljanju poslova sigurnosti ili dužnosti čuvanja javnoga reda, hapšenja počinitelaca krivičnog djela ili čuvanja osobe kojoj je oduzeta sloboda“.

### **Član 7.**

U članu 172. stav 4. riječi: „rasnih, narodnosnih ili vjerskih pobuda“ zamijenjuju se rječju „mržnje“.

### **Član 8.**

Član 202. mijenja se i glasi:

#### **„Član 202.**

#### **Finansiranje terorističkih aktivnosti**

(1) Ko bilo na koji način, izravno ili neizravno, daje ili prikuplja sredstva s ciljem da se upotrijebe ili znajući da će se upotrijebiti u cijelini ili djelimično, za učinjenje:

a) krivičnog djela iz čl. 200. (Uzimanje talaca), i 201. (Terorizam) ovog zakona;  
b) drugog krivičnog djela koje može prouzrokovati smrt ili težu tjelesnu ozljedu civilne osobe ili osobe koja aktivno ne učestvuje u neprijateljstvima u oružanom sukobu, kad je svrha takvog djela, po njegovoj prirodi ili okolnosti, zastrašivanje stanovništva ili prisiljavanje organa vlasti u Federaciji da što učini ili ne učini, bez obzira na to da li su terorističke aktivnosti izvršene i da li su sredstva korištena za izvršavanje terorističkih aktivnosti, kaznit će se kaznom zatvora od jedne do deset godina.

(2) Kaznom iz stava (1) ovog člana kaznit će se ko na bilo koji način, neposredno ili posredno, dâ ili prikupi ili na drugi način osigura sredstva:

a) s ciljem da se ona, u potpunosti ili djelimično, upotrijebe u bilo koju svrhu od strane terorističkih organizacija ili pojedinačnih terorista, ili

b) znajući da će, u potpunosti ili djelimično, biti upotrijebljena za izvršenje krivičnih djela iz stava (1) ovog člana od strane terorističkih organizacija ili pojedinačnih terorista.

(3) Prikupljena sredstva namijenjena za izvršenje ili nastala izvršenjem krivičnog djela iz stava (1) ovog člana bit će oduzeta.

(4) Sredstvima iz st. (1) i (2) ovog člana smatraju se sredstva svake vrste, bilo da se sastoje u stvarima ili pravima, bilo materijalna ili nematerijalna, pokretna ili nepokretna, bez obzira na to kako su stečena te pravni dokumenti ili instrumenti u svakom obliku, uključujući i elektronske ili digitalne, koji dokazuju vlasništvo ili pravo vlasništva nad imovinom, uključujući, ali ne ograničavajući se na bankarske kredite, putničke čekove, bankarske čekove, novčane naloge, udjele, vrijednosne papire, obveznice, mjenice i kreditna pisma.“

### **Član 9.**

U članu 203. stav 4. riječi: „etničke, narodnosne, rasne, vjerske ili jezičke netrpeljivosti“ zamijenjuju se rječju „mržnje“.

### **Član 10.**

U članu 210. st. 1. i 2. mijenjaju se i glase:

„(1) Ko radi zarade ili druge koristi navodi, potiče ili namamljuje drugog na pružanje seksualnih usluga ili na drugi način omogući njegovu predaju drugome radi pružanja seksualnih usluga, ili bilo na koji način učestvuje u organizovanju ili vođenju pružanja seksualnih usluga, kaznit će se kaznom zatvora od šest mjeseci do pet godina.

(2) Bez uticaja je za učinjenje krivičnog djela iz ovog člana je li se osoba koja se navodi, potiče ili namamljuje već ranije bavila prostitucijom.“

### **Član 11.**

Iza člana 210. dodaje se novi čl. 210a. i 210b. koji glase:

#### **„Član 210a.**

#### **Trgovina ljudima**

(1) Ko upotrebom sile ili prijetnjom upotrebe sile ili drugim oblicima prinude, otmicom, prevarom ili obmanom, zloupotrebom vlasti ili uticaja ili položaja bespomoćnosti ili davanjem ili primanjem isplata ili drugih koristi kako bi privolio osobu koja ima kontrolu nad drugom osobom vrbuje, preveze, preda, sakrije ili primi osobu u svrhu iskorištavanja te osobe kaznit će se kaznom zatvora najmanje pet godina.

(2) Ko vrbuje, navodi, preveze, preda, sakrije ili primi osobu koja nije navršila 18 godina života u svrhu iskorištavanja prostitucijom ili drugim oblikom seksualnog iskorištavanja, prisilnim radom ili uslugama, prisilnim prosjačenjem, ropstvom ili

njemu sličnim odnosom, služenjem, odstranjivanjem dijelova ljudskog tijela ili kakvim drugim iskorištavanjem, kaznit će se kaznom zatvora najmanje deset godina.

(3) Iskorištavanje u smislu ovog člana podrazumijeva: prostituciju druge osobe ili druge oblike seksualnog iskorištavanja, prisilni rad ili usluge, prisilno prosjačenje, ropstvo ili njemu sličan odnos, služenje, odstranjivanje dijelova ljudskog tijela ili kakvo drugo iskorištavanje.

(4) Ako je krivično djelo iz st. (1) i (3) ovog člana učinila službena osoba prilikom obavljanja službene dužnosti, učinilac će se kazniti kaznom zatvora od najmanje deset godina.

(5) Ko krivotvori, pribavi ili izda putnu ili ličnu ispravu ili koristi, zadržava, oduzima, mijenja, oštećuje, uništava putnu ili ličnu ispravu druge osobe u svrhu omogućavanja trgovine ljudima kaznit će se kaznom zatvora od jedne do pet godina.

(6) Ko koristi usluge žrtve trgovine ljudima kaznit će se kaznom zatvora od šest mjeseci do pet godina.

(7) Ako je učinjenjem krivičnog djela iz st. (1) i (3) ovog člana prouzrokovano teže narušenje zdravlja, teška tjelesna povreda ili smrt osoba iz st. (1) i (3) ovog člana, učinilac će se kazniti kaznom zatvora najmanje deset godina ili kaznom dugotrajnog zatvora.

(8) Predmeti, prijevozna sredstva i objekti upotrijebljeni za učinjenje djela će se oduzeti.

(9) Na postojanje krivičnog djela trgovine ljudima bez uticaja je okolnost da li je osoba koja je žrtva trgovine ljudima pristala na iskorištavanje.

(10) Protiv žrtve trgovine ljudima koja je bila prisiljena, od strane počinioca krivičnog djela, učestvovati u izvršenju drugog krivičnog djela neće se voditi krivični postupak ako je takvo njeno postupanje bilo neposredna posljedica njenog statusa žrtve trgovine ljudima.

### **Član 210 b. Organizovana trgovina ljudima**

(1) Ko organizuje ili rukovodi grupom ljudi, organizovanom grupom ljudi, ili grupom ljudi za organizovani kriminal koja zajedničkim djelovanjem učini ili pokuša krivično djelo iz člana 210.a. (Trgovina ljudima) ovog zakona kaznit će se kaznom zatvora najmanje deset godina ili dugotrajnim zatvorom.

(2) Ko počini krivično djelo u okviru grupe iz stava (1) ovog člana kaznit će se kaznom zatvora najmanje deset godina.

(3) Pripadnik grupe iz stava (1) ovog člana, koji tu grupu ili udruženje otkrije, može se osloboditi kazne.“

## **Član 12.**

Član 272. mijenja se i glasi:

### **„Član 272. Pranje novca**

(1) Ko novac ili drugu imovinu za koje zna da su pribavljeni počinjenjem krivičnog djela direktno ili indirektno primi, zamijeni, drži, raspolaže njima, koristi u privrednom ili drugom poslovanju, vrši konverziju ili njihov prijenos ili na drugi način prikrije ili pokuša prikriti njihovu prirodu, izvor, lokaciju, raspolaganje, kretanje, vlasništvo ili drugo pravo, a takav novac ili imovinska korist su pribavljeni počinjenjem krivičnog djela koje je propisano ovim zakonom, kaznit će se kaznom zatvora od šest mjeseci do pet godina.

(2) Ako je izvršilac djela iz stava 1. istovremeno i izvršilac ili saučesnik u krivičnom djelu kojim je pribavljen novac ili imovinska korist iz prethodnog stava, kaznit će se zatvorom od jedne do osam godina.

(3) Ako je novac ili imovinska korist iz stava 1. ovog člana velike vrijednosti, učinitelj će se kazniti kaznom zatvora od jedne do deset godina.

(4) Ako djela iz prethodnih stavova izvrši više lica koja su se udružila za vršenje takvih djela, učinitelj će se kazniti zatvorom od dvije do dvanaest godina.

(5) Ako je pri učinjenju krivičnog djela iz st. 1. i 2. ovog člana učinitelj postupio iz nehata u odnosu na okolnost da su novac ili imovinska korist pribavljeni krivičnim djelom, kaznit će se novčanom kaznom ili kaznom zatvora do tri godine.

(6) Novac, imovinska korist, prihod, profit ili druga korist iz imovinske koristi ostvarene krivičnim djelom iz st. (1) do (4) ovog člana oduzet će se.”

## **Član 13.**

U članu 293. stav 3. riječi: „zbog razlike u etničkoj ili narodnosnoj pripadnosti, rasi, vjeroispovjesti, spolu ili jeziku“ zamijenjuju se riječima: „iz mržnje“.

## **Član 14.**

U članu 358. stav 3. iza riječi „prema“ dodaju se riječi: „sudiji ili tužiocu, ili“.

## **Član 15.**

U članu 359. stav 1. iza riječi „napasti“ dodaju se riječi: „sudiju ili tužioca, ili“.

## **Član 16.**

Iza člana 359. dodaje se novi član 359a. koji glasi:

### **„Član 359a. Prinuda prema osobi koja vrši pravosudnu funkciju**

(1) Ko sudiju ili tužioca, silom ili ozbiljnom prijetnjom prinudi da nešto učini, ne učini ili trpi, kazniće se kaznom zatvora do dvije godine.

(2) Ko djelo iz stava 1. ovog člana učini prijetnjom ubistvom, teškom tjelesnom povredom, otmicom ili u sastavu grupe za organizovani kriminal, kazniće se kaznom zatvora od šest mjeseci do pet godina“.

### **Član 17.**

U članu 380. stav 1. iza riječi: „službenu osobu“ dodaju se riječi: „ili arbitra ili sudiju porotnika“, riječi: „svog ovlašćenja“ zamijenjuju se riječima: „svoje funkcije“, a iza riječi: „morala učiniti“ dodaju se riječi: „ili ko posreduje pri ovakvom podmićivanju službene ili odgovorne osobe“.

U stavu 2. iza riječi: „službenu osobu“ dodaju se riječi: „ili arbitra ili sudiju porotnika“, riječi: „svog ovlašćenja“ zamijenjuju se riječima: „svoje funkcije“, a iza riječi: „smjela učiniti“ dodaju se riječi: „ili ko posreduje pri ovakvom podmićivanju službene ili odgovorne osobe“.

U stavu 3. iza riječi: „službenu osobu“ dodaju se riječi: „ili arbitra ili sudiju porotnika“.

### **Član 18.**

U članu 381. stav 1. iza riječi: „službenu osobu“ dodaju se riječi: „ili arbitra ili sudiju porotnika“ i riječi: „svog ovlašćenja“ zamijenjuju se riječima: „svoje funkcije.

U stavu 2. iza riječi: „službenu osobu“ dodaju se riječi: „ili arbitra ili sudiju porotnika“ i riječi: „svog ovlašćenja“ zamijenjuju se riječima: „svoje funkcije“.

U stavu 3. iza riječi: „službenu osobu“ dodaju se riječi: „ili arbitra ili sudiju porotnika“.

### **Član 19.**

Član 382. mijenja se i glasi:

#### **„Član 382.**

#### **Primanje nagrade ili drugog oblika koristi za trgovinu uticajem**

(1) Ko posredno ili neposredno zahtijeva ili zaprimi ili prihvati nagradu ili kakvu drugu korist ili obećanje nagrade ili kakve druge koristi za sebe ili drugoga, da korištenjem svog stvarnog ili pretpostavljenog službenog ili društvenog ili uticajnog položaja ili drugog statusa posreduje da službena ili odgovorna osoba u Federaciji ili strana službena osoba ili arbitar ili sudija porotnik izvrši ili ne izvrši službenu ili drugu radnju kaznit će se kaznom zatvora u trajanju od šest mjeseci do pet godina.

(2) Ko posreduje, koristeći svoj službeni ili društveni ili uticajni položaj ili drugi status, da službena ili odgovorna osoba u institucijama u Federaciji ili strana službena osoba ili arbitar ili sudija porotnik izvrši ili ne izvrši službenu ili drugu radnju kaznit će se kaznom zatvora u trajanju od jedne do osam godina.



- (3) Ako je počinitelj za počinjenje krivičnog djela iz stava 2. ovog člana zahtijevao ili primio ili prihvatio nagradu ili kakvu drugu korist za sebe ili drugoga, kaznit će se kaznom zatvora u trajanju od jedne do 10 godina.
- (4) Primita nagrada ili kakva druga korist bit će oduzeta.“

## **Član 20.**

Iza člana 382. dodaje se novi član 382a. koji glasi:

### **„Član 382a.**

#### **Davanje nagrade ili drugog oblika koristi za trgovinu uticajem**

- (1) Ko posredno ili neposredno osobi koja ima službeni ili društveni ili uticajni položaj ili drugi status učini ili ponudi ili obeća nagradu ili kakvu drugu korist da posreduje da službena ili odgovorna osoba u Federaciji ili strana službena osoba ili arbitar ili sudija porotnik izvrši ili ne izvrši službenu ili drugu radnju kaznit će se kaznom zatvora u trajanju od šest mjeseci do pet godina.
- (2) Ko posredno ili neposredno, na zahtjev osobe koja ima službeni ili društveni ili uticajni položaj ili drugi status, počini krivično djelo iz stava 1. ovog člana i prijavi krivično djelo prije njegovog otkrivanja ili prije saznanja da je djelo otkriveno može se osloboditi kazne.
- (3) Primita nagrada ili kakva druga korist bit će oduzeta, a u slučaju iz stava 2. ovog člana može se vratiti osobi koja je dala nagradu ili kakvu drugu korist.“

## **Član 21.**

Ovaj zakon stupa na snagu narednog dana od dana objavljivanja u “Službenim novinama Federacije BiH”.

**O B R A Z L O Ž E N J E**  
**ZAKONA O IZMJENAMA I DOPUNAMA KRIVIČNOG**  
**ZAKONA FEDERACIJE BOSNE I HERCEGOVINE**

## **I – USTAVNI OSNOV**

Ustavnopravni osnov za donošenje ovog zakona sadržan je u odredbi člana IV.A.20. (1) d) Ustava Federacije Bosne i Hercegovine, kojim je propisano, da je Parlament Federacije Bosne i Hercegovine nadležan za donošenje Zakona o vršenju funkcije federalne vlasti.

Ustavnopravni osnov za donošenje ovog zakona je utvrđen prilikom njegovog prvog usvajanja i ovaj zakon je do sada više puta mijenjan.

## **II – RAZLOZI ZA DONOŠENJE ZAKONA**

Osnovni razlozi za donošenje ovog zakona jesu unapređenje kvalitete zakonskog teksta u odnosu na sve raširenija društveno opasna ponašanja u našem društvu. U tom smislu, koristeći statističke podatke, svakako se može zaključiti da je u evidentnom porastu izvršenje krivičnih djela motivisanih mržnjom zbog rasne pripadnosti, boje kože, vjeroispovijesti, nacionalnog ili etničkog porijekla, invaliditeta, spola, spolnog opredjeljenja ili rodnog identiteta druge osobe. Navedene pojave nužno je suzbiti jasnim zakonskim opredjeljenjem kako bi se i u preventivnom i represivnom smislu ostvarila funkcija krivičnog zakonodavstva. Opredjeljenje ovog zakonskog prijedloga jeste suzbijanje društveno opasnih ponašanja kao što su krivična djela učinjena iz mržnje, krivična djela navođenja na prostituciju, krivična djela trgovine ljudima. U tom smislu, izvršene su odgovarajuće intervencije na općem i posebnom dijelu Krivičnog zakona Federacije Bosne i Hercegovine.

Kao argument u korist navedenih izmjena smatramo potrebnim istaći da je na snagu stupio Zakon o izmjenama i dopunama Krivičnog zakona Bosne i Hercegovine („Službeni glasnik BiH“, broj 40/15) čime je nastala pravna praznina u regulisanju krivičnog djela trgovine ljudima na nivou Federacije Bosne i Hercegovine, te je nužno što prije izvršiti potrebnu intervenciju kako bi se otklonile moguće negativne posljedice postojanja takvog pravnog vakuma.

## **III - OBRAZLOŽENJE POJEDINIH ZAKONSKIH RJEŠENJA**

Članom 1. ovog zakonskog prijedloga vrši se intervencija na članu 2. Krivičnog zakona Federacije Bosne i Hercegovine (u daljem tekstu: Zakon) na način da se uvodi definicija arbitra, sudije porotnika kao i definicija zločina iz mržnje i odredba da će se krivično djelo izvršeno iz mržnje uzeti kao otežavajuća okolnost prilikom odmjeravanja kazne ukoliko ovim Zakonom nije izričito propisano teže kažnjavanje. Navedenom odredbom vrši se harmonizacija Krivičnog zakona Federacije Bosne i Hercegovine sa odredbama Krivičnog zakona Bosne i Hercegovine.

Članom 2. Prijedloga zakona vrši se dopuna važeće odredbe člana 16. stav 1. Zakona na način da se tim zakonskim tekstom uređuje da zastarjevanje krivičnog gonjenja za djela trajnog karaktera počinje teći u trenutku prestanka protivpravnog stanja.

Članom 3. ovog zakonskog prijedloga vrši se intervencija na članu 43a. stav (2) Zakona, na način da se briše dio odredbe koji je propisivao zamjenu kazne zatvora novčanom kaznom izjednačavanjem s jednim dnevnim iznosom novčane kazne. Navedena intervencija izvršena je iz razloga što su se u primjeni navedenog instituta pojavila određena sporna pitanja prilikom kojih su sudovi različito postupali, a što je u konačnici dovelo do nejednakog položaja osuđenih osoba – podnositelja zahtjeva za zamjenu kazne zatvora do jedne godine novčanom kaznom u postupku odlučivanja o njihovom zahtjevu. U prilog navedene intervencije ukazujemo da je odredbom člana 57. stav (3) KZ FBiH propisano da se u slučaju uračunavanja pritvora u kaznu zatvora, odnosno novčanu kaznu dan pritvora izjednačava sa jednim danom zatvora, odnosno sa 100 KM.

Članom 5. ovog zakonskog prijedloga predviđa se da se osobe osuđene na kaznu dugotrajnog zatvora, nakon izdržane dvije trećine izrečene kazne mogu premijestiti u ustanovu za izvršenje krivične sankcije poluotvorenog tipa. Predmetna odredba predviđa da će se uvjeti pod kojima se može izvršiti premještaj propisati Zakonom o izvršenju krivičnih sankcija Federacije BiH.

Članom 6. ovog zakonskog prijedloga vrši se intervencija na članu 166. stav 2. tačka c) Zakona na način da se navedena odredba usklađuje sa novom definicijom zločina iz mržnje iz člana 1. ovog prijedloga. Također se vrši harmonizacija sa Krivičnim zakonom Republike Srpske na način da se kao kvalifikovani oblik ubistva propisuje i ubistvo sudije, tužioca ili njihovog saradnika u vezi sa vršenjem njihove sudijske ili tužilačke funkcije.

Članom 8. ovog zakonskog prijedloga vrši se usklađivanje definicije krivičnog djela finansiranje terorističkih aktivnosti u skladu sa međunarodnim standardima čime se ispunjavaju obaveze Bosne i Hercegovine u usklađivanju krivičnog zakonodavstva.

Čl. 10. i 11. ovog zakonskog prijedloga vrši se intervencija na zakonskom tekstu na način da se mijenja član 210. „Navođenje na prostituciju“ te iza člana 210. dodaje novi član 210a. kojim se propisuje krivično djelo „Trgovine ljudima“ te član 210b. Organizovana trgovina ljudima. Definicija krivičnog djela „trgovine ljudima“ propisana je u skladu sa međunarodnim standardima jedino u odredbi člana 186. Krivičnog zakona BiH. Naime, elementi izvršenja krivičnog djela - radnja izvršenja, način izvršenja i svrha - propisani su kao posebni elementi u skladu sa Protokolom iz Palerma i Evropskom konvencijom.

Još 2005. godine, u svom izvještaju Komitetu za ljudska prava Ujedinjenih Nacija, Sigma Huda, specijalna izvjestiteljica za trgovinu ljudima, posebno ženama i djecom pozvala je vlasti BiH da izvrše harmonizaciju krivičnih zakona u ovoj oblasti. Nakon toga su uslijedili brojni pozivi da se to učini: 2009. godine, OSCE Misija u BiH izdala je opširan izvještaj i dala konkretne preporuke, 2010. godine, Vijeće Evrope u svom šesnaestom izvještaju o usklađenosti sa obavezama i provođenju post-

pristupnog programa saradnje, navodi da dvosmislene odredbe u krivičnim zakonima entiteta predstavljaju prepreku za kriminalizaciju slučajeva trgovine ljudima. Pored toga, o ovom problemu detaljno govori i Analiza pravnih propisa koji se odnose na borbu protiv trgovine ljudima u Bosni i Hercegovini, koju su pripremili OSCE-ov Ured za demokratske institucije i ljudska prava (ODIHR) i Vijeće Evrope, te su jasni pozivi za harmonizaciju legislative upućeni i u godišnjem Izvještaju o trgovini ljudima State Departmenta SAD-a, kao i u posljednjem Izvještaju o napretku BiH koji je izdala Evropska komisija.

Predloženim izmjenama i dopunama krivičnih zakona u potpunosti bi se ispunile međunarodne obaveze BiH, te bi se riješio problem sukoba nadležnosti, na način da bi Tužilaštvo BiH i Sud BiH zadržali nadležnost samo u slučajevima gdje se trgovina ljudima vrši u međunarodnom prometu. Svi ostali slučajevi bili bi procesuirani na entitetskom i nivou Distrikta Brčko. Krivično djelo „navođenje na prostituciju“ zadržalo bi osnovni oblik, uz pretpostavku dobrovoljnosti i punoljetstva.

Na osnovu navedenih argumenta dosljedno je izvršena izmjena zakona u navedenom dijelu zakonskog teksta.

Kao argument u korist navedenih izmjena smatramo potrebnim istaći da je stupio na snagu Zakon o izmjenama i dopunama Krivičnog zakona Bosne i Hercegovine („Službeni glasnik BiH“, broj 40/15) čime je nastala pravna praznina u regulisanju krivičnog djela trgovine ljudima na nivou Federacije Bosne i Hercegovine, te je nužno što prije izvršiti potrebnu intervenciju kako bi se otklonile moguće negativne posljedice postojanjem takvog pravnog vakuma.

Pored navedenog a u vezi sa intervencijom u članu 16. ovog prijedloga na odgovarajući način vrši se intervencija na članu 358. stav 3., članu 359. stav 1., kao i uvodi novi član 359a. pod nazivom „Prinuda prema osobi koja vrši pravosudnu funkciju“, čime se na odgovarajući način uvodi mehanizam zaštite osoba koje vrše pravosudne funkcije, odnosno sudija, tužilaca i njihovih saradnika. Navedenim zakonskim odredbama bi se na dosljedan način kaznili počinioci propisanih krivičnih djela.

Navedenim izmjenama i dopunama Krivičnog zakona vrši se usklađivanje sa odredbama Zakona o izmjenama i dopunama Krivičnog zakona Bosne i Hercegovine („Službeni glasnik BiH“, broj 40/15) te istovremeno ispunjavaju obaveze iz Greco preporuka kao i obaveza Bosne i Hercegovine za usklađivanje krivičnog zakonodavstva u Bosni i Hercegovini.

#### **IV – FINANSIJSKA SREDSTVA**

Za sprovođenje ovog zakona nije potrebno osigurati dodatna finansijska sredstva u Budžetu Federacije BiH.

## ODREDBE ZAKONA KOJE SE MIJENJAJU

### Član 2.

#### Značaj izraza u ovom zakonu

(1) *Krivično zakonodavstvo* u Federaciji sačinjavaju krivičnopravne odredbe sadržane u ovom zakonu, drugim zakonima Federacije i zakonima kantona.

(2) *Teritorija Federacije* je kopnena teritorija, obalno more i vodene površine unutar njenih granica, te zračni prostor nad njima.

(3) *Službena osoba* je izabrani ili imenovani službenik ili druga službena osoba u organima zakonodavne, izvršne i sudske vlasti i u drugim organima uprave i službama za upravu Federacije, kantona, gradova i općina koje obavljaju određene upravne, stručne i druge poslove u okviru prava i dužnosti vlasti koja ih je osnovala; osoba koja stalno ili povremeno vrši službenu dužnost u navedenim organima i tijelima; ovlaštena osoba u privrednom društvu ili u drugoj pravnoj osobi kojoj je zakonom ili drugim propisom donesenim na osnovu zakona povjereno obavljanje javnih ovlaštenja, a koja u okviru tih ovlasti obavlja određenu funkcija; te druga osoba koja obavlja određenu službenu funkcija na osnovu ovlaštenja iz zakona ili drugog propisa donesenog na osnovu zakona.

(4) *Vojna osoba*, u smislu ovog Zakona, je profesionalna vojna osoba i osoba u rezervnom sastavu dok je na službi u Oružanim snagama Bosne i Hercegovine, u skladu sa Zakonom o službi u Oružanim snagama Bosne i Hercegovine.

(5) Kad je kao učinitelj pojedinog krivičnog djela označena službena osoba ili vojna osoba, osobe iz stava 3. ovog člana mogu biti učinitelji tih djela, ako iz obilježja pojedinog krivičnog djela ili iz pojedinog propisa ne proizilazi da učinitelj može biti samo neka od tih osoba.

(6) *Odgovorna osoba* je osoba u privrednom društvu ili u drugoj pravnoj osobi kojoj je s obzirom na njenu dužnost ili na osnovu posebne ovlasti povjeren određeni krug poslova koji se odnose na primjenu zakona ili propisa donesenih na osnovu zakona, ili općeg akta privrednog društva ili druge pravne osobe u upravljanju i rukovanju imovinom, ili se odnose na rukovođenje proizvodnjom ili nekom drugom privrednom djelatnošću ili na nadzor nad njima. Odgovornom osobom smatra se i službena osoba u smislu stava 3. ovog člana kad su u pitanju radnje čijim je učiniteljem označena odgovorna osoba, a nisu propisane kao krivično djelo odredbama glave o krivičnim djelima protiv službene i druge odgovorne funkcije ili odredbama o krivičnim djelima čiji je učinitelj službena osoba propisanim u nekoj drugoj glavi ovog zakona ili drugim zakonom Federacije ili kantona.

(7) Kad je kao učinitelj krivičnih djela označena službena ili odgovorna osoba, sve osobe iz st. 3. i 5. ovog člana mogu biti učinitelji tih djela, ako iz zakonskih obilježja pojedinog krivičnog djela ne proizilazi da učinitelj može biti samo neka od tih osoba.

(8) *Strana službena osoba* je član zakonodavnog, izvršnog, upravnog ili sudskog organa strane države, javni službenik međunarodne organizacije i njezinih tijela, sudija i drugi službenik međunarodnog suda, službujući u Federaciji koja radi za naknadu ili bez naknade.

(9) *Dijete* je, u smislu ovog zakona, osoba koja nije navršila četrnaest godina života.

(10) *Maloljetnik* je, u smislu ovog zakona, osoba koja nije navršila osamnaest godina života.

(11) *Pravna osoba* je, u smislu ovog zakona, Bosna i Hercegovina, Federacija, Republika Srpska, Distrikt Brčko Bosne i Hercegovine, kanton, grad, općina, mjesna zajednica, svaki organizacioni oblik privrednog društva i svi oblici povezivanja privrednih društava, ustanova, ustanova za obavljanje kreditnih i drugih bankarskih poslova ili za osiguranje osoba i imovine, te druge finansijske institucije, fond, političke stranke, udruženja građana i drugi oblici udruživanja koji mogu sticati sredstva i koristiti ih na isti način kao i svaka druga institucija ili organ koji ostvaruje i koristi sredstva i kojem je zakonom priznato svojstvo pravne osobe.

(12) *Privredno društvo* je, u smislu ovog zakona, korporacija, poduzeće, ortakluk i svaki organizacioni oblik registriran za obavljanje privredne aktivnosti.

(13) *Udruženje* je bilo koji oblik udruživanja tri ili više osoba.

(14) *Više osoba* je najmanje dvije osobe.

(15) *Skupina ljudi* je najmanje pet osoba.

(16) *Grupa ljudi* je udruženje od najmanje tri osobe koje su povezane radi trajnog, ponovljenog ili povremenog činjenja krivičnih djela, pri čemu svaka od tih osoba učestvuje u učinjenju krivičnog djela.

(17) *Organizirana grupa ljudi* je grupa ljudi koja je formirana, a nije nastala spontano, radi izravno slijedećeg učinjenja krivičnog djela, čiji članovi ne moraju imati formalno određene uloge, koja ne mora imati slijed članstva niti razvijenu organizaciju.

(18) *Grupa za organizirani kriminal* je organizirana grupa ljudi od najmanje tri osobe, koja postoji neko vrijeme, djelujući u cilju učinjenja jednog ili više krivičnih djela za koja se po zakonu može izreći kazna zatvora preko tri godine ili teža kazna.

(19) *Izbjeglica ili raseljena osoba* je, u smislu ovog zakona, osoba koja je napustila svoju imovinu na području Federacije u vremenu između 30. aprila 1991. godine i 4. aprila 1998. godine, za koju se pretpostavlja da je izbjeglica ili raseljena osoba po Aneksu 7. Općeg okvirnog sporazuma za mir u Bosni i Hercegovini.

(20) *Članovi porodice*, u smislu ovog zakona, jesu: bračni i izvanbračni drug, bivši bračni i izvanbračni drug, krvni rođak u ravnoj liniji, usvojitelj i posvojenik, rođak u pobočnoj liniji do trećeg stepena zaključno i srodnik po tazbini do drugog stepena zaključno.

(21) *Tajna Federacije, kantona, grada i općine* je podatak ili isprava koja je zakonom, drugim propisom ili općim aktom nadležnog tijela donesenim na osnovu zakona, određena tajnom Federacije, čijim bi otkrivanjem nastupile štetne posljedice za Federaciju, kanton, grad i općinu.

(22) *Vojna tajna* je podatak ili isprava koja je zakonom, drugim propisom ili aktom nadležnog organa Federacije donesenim na osnovu zakona proglašena vojnom tajnom.

(23) *Službena tajna* je podatak ili isprava koja je zakonom, drugim propisom ili općim aktom nadležne institucije u Federaciji, kantonu, gradu i općini donesenim na osnovu zakona proglašena službenom tajnom.

(24) *Poslovna tajna* je podatak ili isprava koja je zakonom, drugim propisom ili općim aktom privrednog društva, ustanove ili druge pravne osobe određen poslovnom tajnom, a koji predstavlja proizvodnu tajnu, rezultate istraživačkog ili konstrukcijskog rada, te drugi podatak zbog čijeg bi priopćavanja neovlaštenoj osobi mogle nastupiti štetne posljedice za njezine privredne interese.

(25) *Profesionalna tajna* je podatak o osobnom ili obiteljskom životu stranaka koji saznaju odvjetnici, branitelji, notari, doktori medicine, doktori stomatologije, primalje ili drugi zdravstveni djelatnici, psiholozi, djelatnici staranja, vjerski ispovjednici i druge osobe u obavljanju svog zvanja.

(26) *Isprava* je svaki predmet koji je podoban ili određen da služi kao dokaz kakve činjenice koja je od značenja za pravne odnose.

(27) *Novac* je kovano ili papirnato sredstvo plaćanja koje je na osnovu zakona u opticaju u Bosni i Hercegovini ili u stranoj državi.

(28) *Znaci za vrijednost* podrazumijevaju i strane znakove za vrijednost.

(29) *Pokretnina* je i svaka proizvedena ili skupljena energija za davanje svjetlosti, topline ili kretanja, te telefonski i drugi impulsi.

(30) *Prijevozno sredstvo* je svako plovilo, vozilo i letjelica, kao i bilo kakvo drugo sredstvo koje se može koristiti za prijevoz u suhozemnom, vodenom ili zračnom prometu, bez obzira na vrstu pogona.

(31) *Sila* je i primjena hipnoze ili omamljujućih sredstava s ciljem da se ko protiv svoje volje dovede u nesvjesno stanje ili onesposobi za otpor.

(32) *Opojna droga* je medicinski lijek ili opasna supstanca s adiktivnim i psihotropnim svojstvima, ili supstanca koja se lahko može pretvoriti u takvu supstancu ako podliježe nadzoru po međunarodnoj konvenciji koju je Bosna i Hercegovina potvrdila, ili supstanca koja je proglašena opojnom drogom od nadležne institucije Bosne i Hercegovine ili nadležne institucije entiteta.

(33) *Izražavanje* u jednom gramatičkom rodu, muškom ili ženskom, uključuje oba roda fizičkih osoba.

## **Član 16.**

### **Tok i prekid zastarjelosti krivičnog gonjenja**

(1) Zastarijevanje krivičnog gonjenja počinje od dana kad je krivično djelo učinjeno.

(2) Zastarijevanje ne teče za vrijeme za koje se po zakonu krivično gonjenje ne može poduzeti ili nastaviti.

(3) Zastarijevanje se prekida svakom procesnom radnjom koja se poduzima radi gonjenja učinitelja zbog učinjenog krivičnog djela.

(4) Zastarijevanje se prekida i kad učinitelj, u vrijeme dok teče rok zastarjelosti, učini isto tako teško ili teže krivično djelo.

(5) Sa svakim prekidom zastarijevanje počinje ponovno teći.

(6) Zastarjelost krivičnog gonjenja nastupa u svakom slučaju kad protekne dvaput onoliko vremena koliko zakon propisuje za zastarjelost krivičnog gonjenja.

**Član 43a.**  
**Zamjena kazne zatvora**

(1) Izrecena kazna zatvora u trajanju do jedne godine će se, na zahtjev osuđenika, zamijeniti novčanom kaznom koja se plaća u jednokratnom iznosu u roku do 30 dana.

(2) Kazna zatvora zamjenjuje se novčanom kaznom tako što se svaki dan izrecene kazne zatvora izjednačuje s jednim dnevnim iznosom novčane kazne ili sa 100 KM ako se novčana kazna utvrđuje u određenom iznosu.

(3) Ako se novčana kazna ne plati u roku iz stava (1) ovog člana, sud će donijeti odluku o izvršenju kazne zatvora. Ako se novčana kazna plati samo djelimično, izvršit će se kazna zatvora srazmjerno iznosu koji nije plaćen.

**Član 43b.**  
**Kazna dugotrajnog zatvora**

(1) Za najteže oblike teških krivičnih djela počinjenih s umišljajem može se propisati kazna dugotrajnog zatvora u trajanju od 21 do 45 godina.

(2) Kazna dugotrajnog zatvora nikada se ne može propisati kao jedina glavna kazna za pojedino krivično djelo.

(3) Kazna dugotrajnog zatvora ne može se izreći počinitelju koji u vrijeme počinjenja krivičnog djela nije navršio 21 godinu života.

(4) Kazna dugotrajnog zatvora izriče se samo na pune godine.

(5) Ako je izrecena kazna dugotrajnog zatvora, amnestija i pomilovanje mogu se dati tek nakon izdržanih tri petine te kazne.

**Član 110.**

**Izvršenje kazne zatvora**

(1) Kazna zatvora i kazna maloljetničkog zatvora izvršavaju se u zatvorenim, poluotvorenim ili otvorenim ustanovama za izdržavanje kazne.

(2) Kazna dugotrajnog zatvora izvršava se u zatvorenim ustanovama za izdržavanje kazne.

(3) Kućni zatvor sa elektronskim nadzorom izvršava se u prostorijama u kojima osuđena osoba stanuje u mjestu prebivališta, odnosno boravišta.

**Član 166.**

**Ubistvo**

(1) Ko drugoga usmrti, kaznit će se kaznom zatvora najmanje pet godina.

(2) Kaznom zatvora najmanje deset godina ili kaznom dugotrajnog zatvora kaznit će se:

a) ko drugog usmrti na okrutan ili podmukao način;

b) ko drugog usmrti pri bezobzirnom nasilničkom ponašanju;

c) ko drugog usmrti iz rasnih, narodnosnih ili vjerskih pobuda;



- d) ko drugog usmrti iz koristoljublja, radi učinjenja ili prikrivanja kog drugog krivičnog djela, iz bezobzirne osvete ili iz drugih niskih pobuda;
- e) ko usmrti službenu ili vojnu osobu pri vršenju poslova sigurnosti ili dužnosti čuvanja javnoga reda, uhićenja učinitelja krivičnog djela ili čuvanja osobe kojoj je oduzeta sloboda.

## **Član 172.**

### **Teška tjelesna ozljeda**

- (1) Ko drugoga teško tjelesno ozlijedi ili mu zdravlje teško naruši, kaznit će se kaznom zatvora od šest mjeseci do pet godina.
- (2) Ko krivično djelo iz stava 1. ovog člana učini prema bračnom partneru ili osobi s kojom živi u izvanbračnoj zajednici ili roditelju svog djeteta s kojim ne živi u zajednici, kaznit će se kaznom zatvora od jedne do pet godina.
- (3) Ko drugoga tjelesno ozlijedi ili mu zdravlje naruši tako teško da je zbog toga doveden u opasnost život ozljeđenog ili je uništen ili trajno i u znatnoj mjeri oslabljen koji važan dio njegova tijela ili koji važan organ, ili je prouzrokovana trajna nesposobnost za rad ozljeđenog ili trajno i teško narušenje njegova zdravlja ili unakaženost, kaznit će se kaznom zatvora od jedne do deset godina.
- (4) Kaznom iz stava 3. ovog člana kaznit će se ko krivično djelo iz stava 1. ovog člana učini iz rasnih, narodnosnih ili vjerskih pobuda.
- (5) Ako ozlijeđeni umre zbog ozljede iz st. 1. do 4. ovog člana, učinitelj će se kazniti kaznom zatvora od jedne do dvanaest godina.
- (6) Ko krivično djelo iz st. od 1. do 3. ovog člana učini iz nehata, kaznit će se kaznom zatvora do tri godine.
- (7) Ko krivično djelo iz st. od 1. do 3. ovog člana učini namah, doveden bez svoje krivnje u jaku razdraženost napadom ili teškim vrijeđanjem od ozljeđenog, kaznit će se kaznom zatvora od tri mjeseca do tri godine.
- (8) Ko krivično djelo iz stava 4. ovog člana učini namah, doveden bez svoje krivnje u jaku razdraženost napadom ili teškim vrijeđanjem od ozljeđenog, kaznit će se kaznom zatvora od šest mjeseci do pet godina.

## **Član 202.**

### **Finansiranje terorističkih aktivnosti**

Ko bilo na koji način, izravno ili neizravno, daje ili prikuplja sredstva s ciljem da se upotrijebe ili znajući da će se upotrijebiti u cjelini ili djelimično, za učinjenje:

- a) krivičnog djela iz čl. 200. (*Uzimanje talaca*) i 201. (*Terorizam*) ovog zakona;
- b) drugog krivičnog djela koje može prouzrokovati smrt ili težu tjelesnu ozljedu civilne osobe ili osobe koja aktivno ne učestvuje u neprijateljstvima u oružanom sukobu, kad je svrha takvog djela, po njegovoj prirodi ili okolnosti, zastrašivanje stanovništva ili

prisiljavanje organa vlasti u Federaciji da što učini ili ne učini, kaznit će se kaznom zatvora od jedne do deset godina.

## **Član 203.**

### **Silovanje**

(1) Ko drugu osobu upotrebom sile ili prijetnje da će izravno napasti na njezin život ili tijelo ili na život ili tijelo njoj bliske osobe prisili na spolni odnošaj ili s njim izjednačenu spolnu radnju, kaznit će se kaznom zatvora od jedne do deset godina.

(2) Ko krivično djelo iz stava 1. ovog člana učini na naročito okrutan ili naročito ponižavajući način, ili ako je istom prilikom prema istoj žrtvi učinjeno više spolnih odnošaja ili s njim izjednačenih spolnih radnji od više učinitelja, kaznit će se kaznom zatvora od tri do petnaest godina.

(3) Ako je krivičnim djelom iz stava 1. ovog člana prouzrokovana smrt silovane osobe, ili je ona teško tjelesno ozlijeđena, ili joj je teško narušeno zdravlje, ili je silovana ženska osoba ostala trudna, učinitelj će se kazniti kaznom zatvora najmanje tri godine.

(4) Kaznom iz stava 2. ovog člana kaznit će se ko učini krivično djelo iz stava 1. ovog člana zbog etničke, narodnosne, rasne, vjerske ili jezičke netrpeljivosti prema žrtvi.

(5) Ko krivično djelo iz stava 1. ovog člana učini prema maloljetniku, kaznit će se kaznom zatvora najmanje tri godine.

(6) Ko krivično djelo iz st. 2., 3. i 4. ovog člana učini prema maloljetniku, kaznit će se kaznom zatvora najmanje pet godina.

(7) Ako su krivičnim djelom iz stava 2. ovog člana prouzrokovane posljedice iz stava 3. ovog člana, učinitelj će se kazniti kaznom zatvora najmanje pet godina.

## **Član 210.**

### **Navođenje na prostituciju**

(1) Ko radi ostvarenja koristi navodi, potiče ili namamljuje drugog na pružanje seksualnih usluga ili na drugi način omogući njegovu predaju drugome radi pružanja seksualnih usluga, ili bilo na koji način učestvuje u organiziranju ili vođenju pružanja seksualnih usluga, kaznit će se kaznom zatvora od jedne do pet godina.

(2) Ko radi ostvarenja koristi silom ili prijetnjom upotrebe sile ili nanošenja veće štete drugog prisili ili obmanom navede na pružanje seksualnih usluga, kaznit će se kaznom zatvora od jedne do deset godina.

(3) Kaznom iz stava 2. ovog člana kaznit će se ko radi ostvarenja koristi, na način iz stava 2. ovog člana, koristeći tešku situaciju proisteklu iz boravka neke osobe u stranoj zemlji, prisili ili navede tu osobu na pružanje seksualnih usluga.

(4) Ko krivično djelo iz st. od 1. do 3. ovog člana učini prema djetetu ili maloljetniku, kaznit će se kaznom zatvora od tri do petnaest godina.

(5) Bez uticaja je za učinjenje krivičnog djela iz ovog člana je li se osoba koja se navodi, potiče, namamljuje ili prisiljava već ranije bavila prostitucijom.

## **Član 272.**

### **Pranje novca**

(1) Ko novac ili imovinu za koju zna da su pribavljeni učinjenjem krivičnog djela primi, zamijeni, drži, njome raspoláže, upotrijebi u privrednom ili drugom poslovanju ili na drugi način prikrije ili pokuša prikriti, kaznit će se kaznom zatvora od šest mjeseci do pet godina.

(2) Ako je novac ili imovinska korist iz stava 1. ovog člana velike vrijednosti, učinitelj će se kazniti kaznom zatvora od jedne do deset godina.

(3) Ako je pri učinjenju krivičnog djela iz st. 1. i 2. ovog člana učinitelj postupio iz nehata u odnosu na okolnost da su novac ili imovinska korist pribavljeni krivičnim djelom, kaznit će se novčanom kaznom ili kaznom zatvora do tri godine.

(4) Novac i imovinska korist iz st. od 1. do 3. ovog člana oduzet će se.

## **Član 293.**

### **Oštećenje tuđe stvari**

(1) Ko ošteti, uništi ili učini neupotrebljivom tuđu stvar, kaznit će se novčanom kaznom ili kaznom zatvora do šest mjeseci.

(2) Ko ošteti, izobličiti, uništi ili učini neupotrebljivom tuđu stvar koja služi za vjerske svrhe, kulturno dobro koje se nalazi na javnom mjestu, posebno zaštićeni objekt prirode, umjetnički predmet, stvar od naučnog ili tehničkog značenja, stvar koja se nalazi u javnoj zbirici ili je izložena za javnost ili stvar koja služi za javne potrebe ili koja uljepšava trgove, ulice ili parkove, kaznit će se novčanom kaznom ili kaznom zatvora do jedne godine.

(3) Kaznom iz stava 2. ovog člana kaznit će se ko učini djelo iz stava 1. ovog člana zbog razlike u etničkoj ili narodnosnoj pripadnosti, rasi, vjeroispovijesti, spolu ili jeziku.

## **Član 358.**

### **Sprečavanje službene osobe u vršenju službene radnje**

(1) Ko silom ili prijetnjom da će izravno upotrijebiti silu spriječi službenu osobu u vršenju službene radnje koju je poduzela u okviru svojih ovlasti ili je na isti način prisili na obavljanje službene radnje,

kaznit će se kaznom zatvora od tri mjeseca do tri godine.

(2) Ako je krivičnim djelom iz stava 1. ovog člana službena osoba uvrijeđena, zlostavljana ili je lahko tjelesno ozlijeđena ili je krivično djelo iz stava 1. ovog člana učinjeno prijetnjom upotrebe oružja, kaznit će se kaznom zatvora od šest mjeseci do pet godina.

(3) Ko krivično djelo iz st. 1. i 2. ovog člana učini prema službenoj osobi pri obavljanju poslova javne sigurnosti ili sigurnosti Federacije ili funkcija i čuvanja javnog reda,

uhićenja učinitelja krivičnog djela ili čuvanja osobe kojoj je oduzeta sloboda, kaznit će se kaznom zatvora od jedne do deset godina.

(4) Ako je učinitelj krivičnog djela iz st. od 1. do 3. ovog člana bio izazvan protuzakonitim ili grubim postupanjem službene osobe, može se osloboditi kazne.

### **Član 359.**

#### **Napad na službenu osobu u vršenju poslova sigurnosti**

(1) Ko napadne ili ozbiljno prijeti da će napasti službenu osobu ili osobu koja joj pomaže u vršenju poslova javne sigurnosti ili sigurnosti Federacije ili dužnosti čuvanja javnog reda, kaznit će se kaznom zatvora od tri mjeseca do tri godine.

(2) Ako je krivičnim djelom iz stava 1. ovog člana službena osoba ili osoba koja joj pomaže lahko tjelesno ozlijeđena ili je krivično djelo iz stava 1. ovog člana učinjeno uz prijetnju upotrebom oružja, učinitelj će se kazniti kaznom zatvora od šest mjeseci do pet godina.

(3) Ako je krivičnim djelom iz stava 1. ovog člana službena osoba ili osoba koja joj pomaže teško tjelesno ozlijeđena, učinitelj će se kazniti kaznom zatvora od jedne do deset godina.

(4) Ako je učinitelj krivičnog djela iz st. od 1. do 3. ovog člana bio izazvan protuzakonitim ili grubim postupanjem službene osobe ili osobe koja joj pomaže, može se osloboditi kazne.

### **Član 380.**

#### **Primanje dara i drugih oblika koristi**

(1) Službena ili odgovorna osoba u Federaciji, uključujući i stranu službenu osobu, koja zahtijeva ili primi dar ili kakvu drugu korist za sebe ili za drugu osobu, ili koja primi obećanje dara ili kakve koristi za sebe ili za drugu osobu, da u okviru svog ovlašćenja učini što ne bi smjela učiniti ili da ne učini što bi morala učiniti, kaznit će se kaznom zatvora od jedne do deset godina.

(2) Službena ili odgovorna osoba u Federaciji, uključujući i stranu službenu osobu, koja zahtijeva ili primi dar ili kakvu korist za sebe ili za drugu osobu, ili koja primi obećanje dara ili kakve koristi za sebe ili za drugu osobu, da u okviru svog ovlašćenja učini što bi morala učiniti ili da ne učini što ne bi smjela učiniti, kaznit će se kaznom zatvora od šest mjeseci do pet godina.

(3) Kaznom iz stava 2. ovog člana kaznit će se službena ili odgovorna osoba u Federaciji, uključujući i stranu službenu osobu, koja poslije činjenja ili nečinjenja iz st. 1. i 2. ovog člana, a u vezi s tim zahtijeva ili primi dar ili kakvu drugu korist za sebe ili za drugu osobu.

(4) Primljeni dar ili imovinska korist oduzet će se.

### **Član 381.**

#### **Davanje dara i drugih oblika koristi**

(1) Ko službenoj ili odgovornoj osobi u Federaciji, uključujući i stranu službenu osobu, učini ili obeća dar ili kakvu drugu korist, da u okviru svog ovlašćenja učini što ne bi smjela učiniti ili da ne učini što bi morala učiniti, ili ko posreduje pri ovakvom podmićivanju službene ili odgovorne osobe, kaznit će se kaznom zatvora od šest mjeseci do pet godina.

(2) Ko službenoj ili odgovornoj osobi u Federaciji, uključujući i stranu službenu osobu, učini ili obeća dar ili kakvu drugu korist, da u okviru svog ovlašćenja učini što bi morala učiniti ili da ne učini što ne bi smjela učiniti, ili ko posreduje pri ovakvom podmićivanju službene ili odgovorne osobe, kaznit će se novčanom kaznom ili kaznom zatvora do tri godine.

(3) Učinitelj krivičnog djela iz st. 1. i 2. ovog člana koji je dao mito na zahtjev službene ili odgovorne osobe u Federaciji, uključujući i stranu službenu osobu, i prijavio krivično djelo prije njegovog otkrivanja ili saznanja da je otkriveno, može se osloboditi kazne.

(4) Primljeni dar ili imovinska korist oduzet će se, a u slučaju iz stava 3. ovog člana može se vratiti osobi koja je dala mito.

## **Član 382.**

### **Protuzakonito posredovanje**

(1) Ko primi nagradu ili kakvu drugu korist da korišćenjem svog službenog ili uticajnog položaja u Federaciji posreduje da se učini ili ne učini koja službena radnja, kaznit će se novčanom kaznom ili kaznom zatvora do tri godine.

(2) Ko koristeći svoj službeni ili uticajni položaj u institucijama u Federaciji posreduje da se učini službena radnja koja se ne bi smjela učiniti ili da se ne učini službena radnja koja bi se morala učiniti, kaznit će se kaznom zatvora od šest mjeseci do pet godina.

(3) Ako je za učinjenje krivičnog djela iz stava 2. ovog člana primljena nagrada ili kakva druga korist,

učinitelj će se kazniti kaznom zatvora od jedne do deset godina.

(4) Primljena nagrada ili kakva druga korist bit će oduzeta.